

**Siunnersuut uunga: Suliniutini angisuuni illuliortiternernik sanaartornerillu suliassat  
pillugit Inatsisartut inatsisaat nr. 25, 18. december 2012-imeersup allanngortinnissaa  
pillugu Inatsisartut inatsisaat nr. xx, yy 2013-imeersoq (suliniutinut angisuunut inatsit)**  
(Inuussutissarsiornermut Aatsitassaqarnermullu Naalakkersuisoq)

**Saqquumiussinermut allakkiaq**

(Inuussutissarsiornermut Aatsitassaqarnermullu Naalakkersuisoq)

**Siullermeernera**

Matumuuna suliniutinut angisuunut inatsimmut allannguinissamut siunnersuut saqqummiutissavara.

Ukiakkut ataatsimiinnermi kingullermi suliniutinut angisuunut inatsisisstatut siunnersummik Inatsisartut oqaluuserinninnerannut atatillugu Kalaallit Nunaata iluani avataanilu inatsit pillugu annertuumik ammasumik oqallitoqarpoq. Ingammik nunanit allanit sulisartut aningaasarsiamikkut atorfinitstaanermikkullu atugassarisaannut tunngatillugit pissutsit, ataatsimoorussanik isumaqatiginnissinnaanermut pisinnaatitaaffik, aammalu najugaqarfinni suliffeqarfimmi kattuffiit suliumajunnaarnissamut periarfissaat oqallinnermut ilaatigut sakkortuupilussuarmut tunngavissiippuit.

Taamaattumik annerusumik erseqqissaaniarluni maleruagassat erseqqissarneqaqqinnissaat pitsaanerussasoq Naalakkersuisut isumaqarsimapput, tamannalu ilutigalugu nunanit allanit sulisartut minnerpaamik isumannaariffigisaasumik atugassarititaanni killiliussaasup qaffanneqassanera Naalakkersuisut kissaatigisimavaat.

Siunnersuut maannakkut saqqummiunneqartoq suliffeqarfimmi illua' tungeriit sivisunerusumik pitsaasumillu oqaloqatigeereernerisigut ilusilersugaavoq, tusarniaanermullu atatillugu inatsimmut annertuunik maalaaruteqartoqannginnera Naalakkersuisut nuannaarutigalugu paasisimavaat. Taamaattumik maannakkut inuiaqatigiinni piusutut soqutigisaranik assigiinngitsunik siamasinnerpaamik iluseqarluni naapitsisumik inatsisip oqaasertalorsorsimanissa neriuutigaarpuit.

Taamatut oqareerluni Kalaallit Nunaanni suliniutit angisuut ingerlanneqarsinnaanissaat suliniutinut angisuunut inatsisip siunertaqarnerata eqqaamaniarnissaa pingaartuuvoq. Inuussutissarsiornermi suliniutit tamakku inuiaqatigiit aningaasaqarnikkut ineriarternirut immikkut pingaaruteqartussaapput, imalu annertutigalutillu katitigaatigaat nunap nammineq isumallutigisaanik ingerlassinnaanatigit. Taamaattumik nunanit allanit suliffeqarfiiit immikkut ilisimasaminnik sulisartuminnillu tikiussaqarnissaat pisariaqartippagut, suliniutinilu nunatsinnit suliffeqarfiiit sulisartullu peqataatinnissaat pillugit piumasaqaateqarnikkut nunanit allanit suliffeqarfinnit sulisartunillu inuiaqatigiit tamarmiusutut ilinniarnissaminut periarfissaqarnissaat Naalakkersuisut isumannaarniarpaat. Taamaallillutik inuiaqatigiit ilisimasanik piginnaasanillu annertunerusunik sanaartuissapput, suliffeqarfiiit amerlanerusut

pilersinneqassapput, tullissaanilu suliniummik annertunerusumik ingerlassaqartoqalissappat suliassat ilaannik annertunerusunik kivitsiviginninnissamut nukissaqarnerulissaagut.

Tamanna Naalakkersuisut anguniagaraat. Nunatta Karsia immerniaannarlugu suliniutit tamakku ingerlannissaat kissaatigingngilarput – qularutissaanngilaq iluarinassasoq, aammalu suliniutinut akuersissuteqarnissatsinnut tunngaviuvoq, annertoqqataanilli inuiaqatigiinni piginnaasanik sanaartuinissaq, suliffeqarfinnik pilersitsinissaq, inuusuttortagullu ilinniagaqarnissamut allallu allanik ilinniarnissamut kajumissaarnissaat kissaatigaarput, takusinnaassavaammi suliniutit suliffissatut periarfissanik pissanganartunik pilersitsisuunerat.

Siunnersuutip piviusutigut allannguutaanut tunngatillugu nunanit allanit sulisartunut atugassarisat pitsangorneqassapput, minnerpaamik aningaasarsiassat akkordernermi ujariatsinermut tapiliummumt assingusumik qaffanneqarnerisigut, sulinngiffeqarfissap katersuiffiginissaa pillugu aalajangersakkanik aalajangiisoqarneratigut, aammalu aningaasarsianik naatsorsuinermini sulisitsisup nerisat najugaqarnerlu ilanngullugu naatsorsuutigissannginneratigut.

Taamaattorli suliffeqarfimmi illua'tungiusut namminneq aningaasarsiatigut atorfininnermilu pissutsinik isumaqatiginninniarnissaannik tunngavigisamik siunnersuut aalajangiussaqartuuvoq. Taamaattumik nunanit allanit sulisartut akissarsiassanik qaffasinnernik isumaqatiginniuteqarsinnaallutilu allatut atorfinitstaanermut tunngasunik iluaqtissarsiorsinnaapput. Suliniutinut angisuunut inatsit taakkununnga akimmiffissalersuinngilaq, taamaallaat minnerpaamik isumannaarissummik peqlarluni.

Taamatut oqaaseqalunga oqallilluarnissamik kissaassivunga.